



Broj: 12-08-5-1363-1/2023  
Sarajevo, 30.03.2023. godine

**Svi predsjednici općinskih/osnovnih sudova  
Svi predsjednici kantonalnih/okružnih sudova  
Svi predsjednici okružnih privrednih sudova  
Predsjednik Višeg privrednog suda u Banjoj Luci  
Predsjednik Osnovnog suda Brčko Distrikta BiH  
Predsjednik Apelacionog suda Brčko Distrikta BiH**

**Predmet: Provođenje „Sedmica sudske nagodbe“ u sudovima u BiH**

Poštovani,

Visoko sudsko i tužilačko vijeće BiH (VSTV BiH, Vijeće) je svoje strateško opredjeljenje za unapređenje sistema alternativnog rješavanja sporova iskazalo kroz izradu i usvajanje nacrtu Strategije za alternativno rješavanje sporova, koja, između ostalog, obuhvata i institut sudske nagodbe. Iako suštinski ne predstavlja alternativu sudskom odlučivanju, sva nastojanja Vijeća za unapređenjem sistema alternativnog rješavanja sporova uključuju i sudsku nagodbu, kako zbog njenog značaja u pravnoj tradiciji BiH, tako i zbog činjenice da se metode postizanja sudske nagodbe u najvećoj mjeri podudaraju sa metodama koje se koriste u mirnom rješavanju sporova van suda.

Upravo zato, kao dio sistemskog nastojanja da se podigne svijest javnosti o prednostima zaključenja sudske nagodbe, ali i nastojanja da se inicira aktivnija uloga pravosudne zajednice u BiH u pogledu šire upotrebe ovog parničnog instituta, VSTV BiH od 2016. godine organizuje „Sedmice sudske nagodbe“.

S tim u vezi, obavještavamo vas da će se, jedanaeste po redu, „Sedmice sudske nagodbe“ **realizovati u periodu od 15. do 26. maja 2023. godine.**

Kao i do sada, sudovi imaju obavezu da u navedenom periodu zakažu ročišta u što većem broju predmeta u kojima postoji mogućnost sklapanja sudske nagodbe, te da se stranke podstaknu na rješavanje predmeta na ovaj način.

Na ovom mjestu podsjećamo na odredbe procesnih zakona koji regulišu parničnu materiju koja se odnosi na **imperativnost nastojanja suda da**, na način koji ne ugrožava njegovu nepristrasnost, na pripremnom ročištu, kao i u toku cijelog postupka, **stranke zaključe sudsku nagodbu**. O ovim pitanjima se, između ostalog, razgovaralo i tokom panel diskusija na temu uloge suda u zaključenju sudske nagodbe, na kojima su učestvovali predstavnici skoro svih prvostepenih sudova u BiH, tokom kojih se harmonizovao stav učesnika o obavezi suda da aktivno nastoji da stranke postignu sporazumno rješenje spora.

Dosadašnjom analizom nastojanja sudova tokom realizacije ove aktivnosti, uočeno je da određeni sudovi ulažu značajne napore i ostvaruju nadprosječne rezultate, dok kod drugih sudova izostaje adekvatan angažman. Upravo zato, prilikom analize rezultata aktivnosti „Sedmica sudske nagodbe“, posebna pažnja će se posvetiti sudovima koji u prethodnom periodu nisu ostvarivali zadovoljavajuće

rezultate, a rezultati ove aktivnosti i nastojanje pojedinih sudova će, u skladu sa uspostavljenom praksom, biti objavljeni javnosti.

S tim u vezi, pozivamo predsjednike sudova da aktivno pristupe pripremi i organizaciji ove aktivnosti, te da izrade i provedu plan realizacije „Sedmica sudske nagodbe“, koji može uključivati (ali ne treba biti ograničen na):

- 1) održavanje sjednica nadležnih sudskih odjeljenja i/ili kolegija predsjednika suda, s ciljem planiranja aktivnosti i razmatranja pitanja i dilema u pogledu uloge sudije u nastojanju da stranke zaključe sudsku nagodbu;
- 2) obavještenje sudija i stručnih saradnika o potrebi identifikacije predmeta u kojima će se, tokom navedenog perioda, zakazati pripremno ročište/ročište za glavnu raspravu;
- 3) zakazivanje ročišta i naglašavanje mogućnosti zaključenja sudske nagodbe i prednosti sudske nagodbe za stranke u postupku;
- 4) komuniciranje sa medijima (putem saopštenja za javnost, press konferencije i/ili TV/radio/novinskog intervjua) informacije o održavanju sedmica sudske nagodbe i prednosti sudske nagodbe za stranke;
- 5) objavljivanje informacije o održavanju sedmica sudske nagodbe, kao i promotivnih materijala izrađenih od strane VSTV-a BiH, na Internet stranicama sudova;
- 6) iniciranje pitanja zaključivanja sudskih nagodbi prema komunalnim preduzećima i lokalnim samoupravama u predmetima u kojima postoji jasna sudska praksa i visok stepen izvjesnosti u pogledu ishoda spora.

U tom smislu, s ciljem uniformisanja prakse planiranja i izvještavanja o realizaciji aktivnosti sedmica sudske nagodbe, u prilogu ovog dopisa sudovima će biti dostavljen i obrazac Plana realizacije „Sedmica sudske nagodbe“ te obrazac Izvještaja o realizaciji aktivnosti „Sedmica sudske nagodbe“.

Predsjednici sudova su, stoga, do **05. maja 2023. godine**, obavezni dostaviti popunjen obrazac Plana realizacije „Sedmica sudske nagodbe“, koji će uključivati i listu izdvojenih predmeta po kojima će postupati s ciljem sklapanja nagodbe u toku trajanja aktivnosti.

Kad su u pitanju sudovi koji po stvarnoj nadležnosti postupaju u privrednim sporovima, predsjednici istih se pozivaju da sa posebnom pažnjom pristupe realizaciji ove aktivnosti, s obzirom na činjenicu da značajan broj ovih predmeta ima visoku vrijednost spora, te kao takvi značajno utiču na ekonomske tokove u državi. Dužina trajanja privrednih predmeta se negativno reflektuje na poslovanje privrednih subjekata, te bi rješavanje sporova u što kraćem vremenskom roku korištenjem sudske nagodbe, kao alata za rješavanje sporova mirnim putem, doprinijelo stvaranju bolje poslovne klime.

U prilogu ovog dopisa, takođe, ponovo dostavljamo unificirani obrazac – „Obavijest za stranke“, čiji sadržaj je usvojila Stalna komisija za efikasnost i kvalitet sudova, koji je potrebno dostaviti strankama u predmetima koji se vode pred sudom.

Pored toga, VSTV BiH će u narednom periodu intenzivirati on-line promotivnu kampanju u ovom pogledu, kako bi se javnost animirala za ovo pitanje.

S očekivanjem da će aktivnost „Sedmice sudske nagodbe“ ove godine zabilježiti bolje rezultate, srdačno Vas pozdravljam.

S poštovanjem,

Dostavljeno:

- Naslovu;
- a/a



Predsjednik VSTV-a

Halil Lagumdžija